



稽留山人集目錄

第十三卷

敝帚集

詩四十五首

送胡敬懋之總河幕府 家孟超兄壽 沈膳部雲

中典試順天旋有八閩學憲之命賦別 丁未三月

沈臬副繹堂招同諸子雅集漫賦 劉象升祖母七

秩 和甫草贈繹堂坐上客十二首 沛縣閻古古 白下紀伯紫

梁溪錢礎日 黃州劉千里 婁東周子傲 樵李  
俞右吉 廣陵陶季深 壽州戴務旂 汾湖葉星  
期 松陵計甫草 華亭計子山 張步青舅氏母  
主人茸城沈繹堂

忻太君七袞 振音昆弟招同計甫草潘右仍方濬

公暨賢從衛公家弟康侯後圃看花 慈仁花下作

念聖秋常飲我於此慨然悲之 送曹秋嶽先生還  
雲中 項憲副犀水招同閭古古成杏懷李條侯戴  
務旃諸公集河干別舍卽席有賦同用八齊韻 讀  
勞曾三聞鐘集有贈 送備五弟葭湄旋里 四月  
康侯歸詩以紀別 賀劉公猷自秋曹轉銓部郎十  
二韻 卻總制大司馬白公之招率爾言懷 贈吳  
興公 送米紫來司李贛州 送祝山公僉憲之任  
粵西 送祝渭亭隨尊大人之任粵西 題畫贈條  
侯兼送其歸 訓章澹公兼祝借嫂孺人初度 送  
曹次岳歸里兼爲其母壽 懷張天生先生 懷應

嗣寅 哭張步青表舅

稽留山人集第十三卷

丁未

詩四十五首

武水陳祚明肩倩氏著

送胡敬懋之總河幕府

奔走風塵老未安相逢且各勸加餐十函併發才寧易三  
策爭傳遇獨難仙骨看君饒玉貌真經授我說金丹功成  
何日追松子白日凌霄振羽翰

家孟超兄壽

受姓分工正成名愛季方歌從燕市和雲指鳳山長洛下  
聞高會扶風有最良吾宗重耆舊里社憶春觴

沈膳部雲中典試順天旋有八閩學憲之命賦別

首善與賢後炎荒造士勞國風觀嶺海星象涉波濤鋌鹿  
懷游藝轡龍喜建橐敷文資典禮干羽五雲高

丁未三月沈臬副繹堂招同諸子雅集漫賦

暮春三月會羣賢南客相逢在北燕莫更罇前論往事風  
塵合散動經年

其二

客中把酒送殘春景物何如曲水濱飲罷更書修禊序千  
秋得似永和人

其三

柳色參差映玉河銜杯天末共悲歌如何勝集開朱邸白

髮蕭蕭處士多

其四

莫教上客顧金羈授簡須爲紀事詩預恐他年思此日風  
流雲散不勝悲

劉象升祖母七秩

萬壑越山青高門敞畫屏春風看舉案綉褥隱輜駟九陌  
燕山紫栢舟汎淥水秋雨聽鳴機青燈照朱邸劬勞四十  
年操作夜無眠將糜餉孤子上有滄浪天旅食京華餘四  
壁風酸月暗心如石飄零且欲謀負米辛苦何心教畫荻  
咎時抱子悲伶俜今日有孫通一經新婦爲姑代并曰華

顛含笑喜長齡孫能讀書子能養晴日中閨自扶杖白魚  
爲鱠斫纖鱗綠蟻浮杯把春釀槐市聲名作賦才曲江更  
擬看花回京國正開碣石館溪山好築懷清臺

和甫草贈繹堂座上客十二首

沛縣閻古古

何人不識采芝翁皓首龐眉顧盼雄篋裏素書誰得授未  
將踪跡付冥鴻

白下紀伯紫

十年人讀故宮詩白下耆英鬢似絲愁絕燕山長作客消  
中不獨爲脾衰

梁溪錢礎日

隱几應須戴鶻冠治裝底事入長安賣文不異爲傭活肯  
讓當年梁伯鸞

樵李俞右吉

鴛湖才子久知名老去逃名白髮生萬里雲中隨幕府喜  
逢燕市酒同傾

黃州劉千里

吟風弄月想濂溪象表何如蔥嶺西共我長齋非佞佛不  
分何肉與周妻

廣陵陶季深

不知栗里在蕪城烟雨平山泉水清乍挽籃輿來洛下門前五柳爲誰榮

婁東周子俶

北闕上書不見收三江船去剩烏裘諸君莫笑燒丹悞但得金多可散愁

壽州戴務旃

外臺使者號知人下榻能留幸舍賓客裏因君傳夏正鳴鳩戴勝總傷神

汾湖葉星期

故友來甫從子

盡道慈明冠八龍金臺挾册喜重逢竹林當日黃壚酒宿

草餘杭哭嗣宗

華亭計子山

笠澤蒼茫水接天計然亦泛五湖船依劉莫歎長爲客乍喜詩成示惠連

松陵計甫草

多君才是賈長沙放廢江湖莫怨嗟但有五湖三畝宅不妨遶屋種桑麻

主人茸城沈繹堂

西園開宴集羣賓入座俱爲失意人可道平原公子貴鳳池遷客亦沈淪

張步青舅氏母忻太君七袞

喟焉念先人固窮學無荒資敬得所師由也早升堂巍巍  
張夫子數仞矗宮墻道大人莫容文在天未喪經綸慕伊  
周詞賦凌班揚孝廉詎特逢別駕終舍藏歸來隱孤山種  
梅湖上莊失意聊爲娛絲竹樂未央三子名已成側室置  
姬姜夢蘭有同徵植桂欣聯芳是時通德里朱門何輝煌  
簪纓襲累葉著姓瑯琊王棨戟羅朱門羔鴈列兩廂前堂  
設絳帳後房奏笙簧奠楹一以夢黃口天滄浪清溪五畝  
宅綠鬢兩未亾熒熒相依倚紡績具糟糠長大各通經遺  
書授青箱末路厭兵革盜起人倉皇徙宅共奔迸飄零適

窮鄉歿者白骨寒存者朱顏蒼時平始言旋感舊多惻傷  
五常三不存顧視失鴈行樂卻降皂隸甲第委榛莽綠郊  
謝公墅白草如人長高臺旣已圯曲池又以荒穿墉作圭  
竇挿槿爲周防晨餐兼半菽冬婁惟布裳細帙半零落手  
澤認丹黃破壁露青燈誦讀聲琅琅尸饔念母勞負米何  
所將竹笋出不多江魚時一嘗人言歸合璧雙驥爭騰驤  
泮林並馳譽秋風有先鳴北闕三上書歸來復擔囊已勝  
草衣賤不得垂腰章歲月駛以除春秋屢代更三十矢曠  
日四十歷冰霜五十竄異縣離亂走徬徨得見雋有司時  
已六十強七十古所稀獻歲傳椒觴殺鷄以爲饌羹用葍



絲香耳目猶未衰扶杖出中唐里媪或過存諸孫繞膝傍  
依依話疇昔世故變滄桑昔時三鱸堂舊里朱雀桁姻親  
盡許史賓客誰求羊寂寞憶繁華述之安能詳祚明生亦  
晚私淑誼不忘杏花既有壇女蘿亦有岡姊子妻南宮因  
依比東牀多慚符宅相亦欲奉酒漿嗟乎古至治禮樂恢  
天綱臯夔與益稷致主登虞唐末世用雜霸綜覈尚申商  
仕者懷爵祿唯諾無動勦保己守榮華容容多福祥此豈  
須學古空疎未相妨經術可濟時斯道今茫茫瞻言想先  
正遼遼追末光貴珉乃賤玉鷄鶩笑鳳凰上策不見收烏  
裘剝歸裝妻何必宋子食何必河魴家風幸不墮有母壽

且康著我斑斕衣春酒聊持將笙歌譜新詩爛然成文章  
今日樂上樂延年誦無疆

振音昆弟招同計甫草潘右仍方濬公暨賢從衛公

家弟康侯後圃看花

舊日堂前珠履客看花重到天卿宅只有垂楊半欲枯桃  
花更紅梨更白吹笛悠悠畏隔鄰掃室閒閒乍安席褐衣  
共約酒徒來書閣聊爲故人關巡檐倍喜鬪芳新繞徑未  
驚墜狼藉往事風流不堪憶黑頭公輔垂簪憤過雨曾看  
覓百栽秉燭要令飲一石詩篇不厭酬和多勲名俄爲經  
綸惜羣賢且莫漫嗟吁諸弟無嫌異疇昔修竹還曳枚生

裙細草不聞謝公屐蝶銜嫩藥掠池清雀啄荒苔竄階碧  
朝來入園露已晞飲罷倚樹日將夕微吟緩步感不已藉  
草臨流隨所適古來名世何人存麟閣雲臺總陳蹟不醉  
梁園誠枉然不築平泉亦何益只今痛飲判如泥明日花  
殘豈堪摘

慈仁花下作念聖秋常飲我於此慨然悲之

慈仁寺裏花兩樹歲歲游人車馬駐百年老榦笑春風四  
月繁英浥零露扶疎直上三百條連枝接葉鬪妖嬈密映  
琳宮陰蔽芾低垂紅萼影飄搖香燈丈室何年有布金合  
在栽花後采椽丹碧漸已昏此樹婆婆未衰朽我到燕山

十載餘每來宴賞立脚踏歌筵幾惜殘芳日酒盞頻持放  
藥初憶昔仙郎偏愛客鳳池高步初通籍招邀名士曳華  
裾結撰良辰浮大白瞬息年華一紀移秦原宿草已離離  
花猶無恙人安在我亦紅顏異昔時滿樹胭脂仍美色今  
日來看淚沾臆綠酒如川又一春高朋入座歡無極且教  
痛飲莫悲歌存亡衰盛古來多君不見韋監祠前花更好  
年時樵斧斷青柯

送曹秋嶽先生還雲中

西伯朝天出井陘千秋令節拜彤庭金函日麗牋初  
上玉珮風交履乍聽旆轉雲中人作雨槎回參野使爲星

平沙月白無刁斗，恒嶽嗟峨倚翠屏。

其二

瑞玉重頒八伯歸，桑乾北渡引龍旂。  
鴈門紫氣關前識，馬邑青烽谷口稀。  
喉舌幾人調玉燭，股肱千里控金微。  
趣裝他日仍開閣，送別無將淚濕衣。

項憲副犀水，招同闈古古成杏懷李條侯戴務旃諸公集河干別舍卽席有賦同用八齊韻

玉河搖颺柳條齊，高會臨流似會稽。  
白髮無妨游紫陌，青山未許躡丹梯。  
聲名詎可儕龍首，世事應須學馬蹄。  
但使主人能愛客，不論故國草萋萋。

其二

煙波城闕夕陽西，華館張筵客到齊。  
中座先分枚叟札，扁舟遙憶白公堤。  
鳴鞭爭羨青驄步，載酒初聽黃鳥啼。  
四月清和迎夏晚，猶將禊飲序重題。

讀勞曾三聞鐘集有贈

河汾有元經，天祿傳外史。  
藹藹吉人言，千秋服芳軌。  
多君美無度，逢識饒名理。  
嚙嚙莊語勤，鳴鐘振聾耳。  
蘭室入俱化，鷄跖食不已。  
我媿多謬誤，迷途失千里。  
三嘆請回轅，書紳從此始。

送備五弟葭湄旋里

去值薰風候芙蓉西子湖玉盤愛鱸鱖畫楫惱鷗鳧望闕  
無開口行堤自捋鬚長安塵十丈愁絕爾兄俱

四月康侯歸詩以紀別

寧家願爾居乞食使爾出卽歸意良慰惜別恍如失人生  
世上亦大難去住悲喜情非一燕山苦寒非吾土京洛黃  
塵蔽白日自秋徂春今維夏頻得秉燭坐一室對花亦把  
酒吟詩競搖筆老惜百年髮易改貧嗟八口事未畢但須  
青原葬兄嫂未有黃金遺子姪東西南北徒奔忙耕讀樵  
漁思隱逸中夜相語時相泣終朝校計仍無術爲恐傷心  
忍塞默且因聚首蠲愁疾貧賤安往不可得何如歸掘西

山木儘教稅駕聊息筋况已買屋堪容膝束帶對兄禮數  
莊不冠延客性情質雨過種花竹風來理書帙牆外歌聲  
出金石門邊春色生蓬筍爾去莫遲迴我畱轉蕭瑟弟兄  
不見廢壘篋朋友何人似膠漆長安狹邪塵滿路六月襍  
穢汗水溢欲掃相門見訶叱乍往城南忘城北歸期屈指  
何年必

賀劉公猷自秋曹轉銓部郎十二韻

移秩仍郎署論才寄選曹知人推郭泰啓事試山濤鳩署  
曾書最龍門本自高壺觴邀夜月藻鑿辨秋毫視草攜花  
筆含香惹錦袍藤花陰省院蘭葉樹江臯考課年方值澄

清法與操品題隨賞識磨勘藉賢勞主聽爲三耳頻遷豈  
二毛官寧持例進時幸好文遭孔座賓無雜黃墟世欲逃  
竹林交不絕應許醉春醪

卻總制大司馬白公之招率爾言懷

我來作客燕山久偃蹇賣文爲餬口酒錢儘乞但空囊賦  
筆頻援不去手寄食年年好友情幾家設榻競逢迎長依  
北里天卿弟近傍西臺門下生憶昨鹽官張給事論交莫  
逆稱心意傾蓋因隨飛蓋來斷金不惜揮金饋已看青史  
載封章投外烟波出楚湘幕府慇懃招托乘臨岐辭謝後  
嚴裝只言莊助通家好再世相依定交早索米方畱金馬

門食魚爲戀長安道八鸞四牡旗翻風推轂分茅命上公  
東郊師尹邦畿近齊豫遙連節制同書記翩翩需上客軍  
麾誤用虛名擇羔鴈纁黃列兩廂戟門鈴閣虛前席遠游  
本亦念家貧老去東西南北身見許千金寧不羨傳來三  
聘一何頻朱邸棲遲舊同學苦饑亦似東方朔官燭吟詩  
五夜寒俸錢取酒一壺濁然諾悠悠重寸心寧將嬾慢謝  
知音卽今寂寂燕山下爲報遙遙漢水潯

贈吳興公

咎人亦有言士隱良善貧懷寶不售時軾軻多勞辛擇節  
自取苦夫豈由他人乞食迷所之長鋏但隨身裘難禦風

雪詩徒感鬼神幕府走纁黃誰何列上賓  
儉父笑元瑜虛名席上珍  
金門待詔賢因依不失親  
邸舍聊和歌入市沽大春  
旁睨司隸避近前舍人嗔  
詩書雖滿腹不若錢千緡  
我亦久爲客素衣涅緇塵  
相求聲本同相泣遇亦均  
豈如歸伐竹持竿釣紫鱗  
人傳一男子自比七逸民  
逡巡志未遂皓髮颯已新  
且還著君書身訕名獨伸

送米紫來司李贛州

驚代同推班馬儔初勞佐郡指虔州  
楚山迴望燕山遠章水惟兼貢  
水流判筆生花垂月露官齋倚樹引  
春秋君才只合游華省江嶺何堪試  
散投

其二

十年詞客向長安深轍門前簇馬鞍  
看寫青山求不易聞歌白雪和真難  
最書有日褒三殿法律無嗟守一官  
曲水他時懷襖飲鬱孤臺畔路漫漫

送祝山公僉憲之任粵西

一麾持節指賓州露冕何當怨散投  
題柱西曹元執法褰帷南服乍分憂  
潭臨鈇鉞尋山過江出牂牁繞郭流  
溪洞春耕消瘴癘公堂羅拜木綿裘

其二

高名視草重天京愛士常虛左席迎  
雙闕何時聞曳

履萬山此去想飛旌紀游庭下能攜筆按部江邊自濯纓  
朱邸賜環知不遠食魚仍許從清卿

送祝涓亭隨尊大人之任粵西

前有檐帷車後有紫驕馬草草出橫門黃塵暗原野使君  
古名賢才子今作者龍江萬里行赤日五月夏綢繆知己  
情惜別淚盈把我聞柳州郡宵靄磻山溪怪石插雲立古  
洞緣源迷時尋宗元迹或有稚川棲對景賦可成彩筆花  
閒攜石門荔子丹隴首枕林綠銅鼓賽田神炊烟起竹屋  
聽訟驚神明解綬除貪贖報最詔還徵升卿裝旋趣由來  
天人策簡練董生帷棄繻行復來曳履相追隨茲行非遠

別驪駒歌莫悲折柳官道傍欸欸懷前期非無燕市酒留  
待曲江池

題畫贈條侯兼送其歸

剩水殘山帶落暉天涯送別淚沾衣何時隴首秋雲外從  
爾徐驅牧犢歸

訓章澹公兼祝偕嫂孺人初度

良知曠容暉歲月屢已易與子非一身安得不睽隔異體  
抱同心永言念朝夕夢寐越川梁時時見行迹况有瑤華  
音浩歌發金石爲政暇日多悠然懷遠客綢繆愬情好顧  
我非三益

其二

登高盼海曲白雲時可見知我同心友風憲展書卷簡牘  
判縱橫經史窮貫穿舉案勸加餐命酒爵無筭庭下頌春  
椒婆娑弄筆研寒暑無停晷鬢髮日已變棲遲非吾土况  
復疎會面勞歌積悃勤芳辰想歡宴

送曹次岳歸里兼爲其母壽

振衣步廣陌流盼矚康衢軒蓋驚炎埃鼎鼎競居諸浩然  
懷古人所好甚獨殊富貴如浮雲奄忽互相踰朝榮夕已  
謝得失在斯須榮名千秋寶壽與金石俱論定在後人來  
者焉可誣雷同詎足珍今古不相如不有軼羣才誰能市

虛譽之子美無度翰墨聊自娛薄游入京洛棲遲混泥塗  
邸舍遠塵閤衡門臨水隅時爲洛生詠或作桃源圖取酒  
飲賓朋解裘貰黃墟貧交但見投白飯馬青芻坐客東西  
廂問客何所須朱門虛左席欲往且踟躕緗素填几案言  
當召酒徒秋風忽長嘆理楫賦歸歟烟波指故里白髮方  
倚閭霜降橙菊黃酌醴鱸江鱸奉觴粲玉齒下食勸膏腴  
豈能懷四貴珠履堂前趨臨岐贈墨妙秀色朝華敷崢泓  
準董巨蕭散希倪迂寧惟三吳傑近古良亦無由來高士  
駕匿影卧菰蒲我欲尋君去扁舟泛五湖

懷張天生先生



好古著書人食力巖耕者高名在寰區晚節老田野繩牀  
敝仍坐石經熟恒把行獨追古初知希謝天下鏗爾對異  
乎悖然曰父也拂衣時欲嗔掇皮無一假諸孫壯苦貧故  
友存亦寡寥廓失冥鴻歲月疾奔馬容暉不得見引領憂  
難寫

懷應嗣寅

人師不可好况可虛名市詩書未上口力不勝種植鄙夫  
腹空空漫言五經笥歲時以束修朝夕有酒食食已諒欲  
眠得金聊卒歲期期析疑義晞晞問奇字謬誤兩端竭幽  
冥率爾對下帷歷冬春歲月慆已逝老大迄無成悲傷一

長喟夫子何博文貫穿窮百世望洋怖河漢觀水迷涯涘  
稍或分一經漸可通六藝時雨潤萬物洪鈞鑄衆器西河  
真欲疑互鄉豈無誨授書三十年知名七十二師儒田間  
尊矜式國人視汗漫他鄉游詩禮過庭廢枌榆近梓里狔  
犬依臯比糞壤詎可圻輪困幸不棄燕越間音徽相思勞  
夢寐時哉老至速道也朝聞未百慮散殊塗同歸齊一致  
何時通彼我相與冥罔異

哭張步青表舅

枯蓬隨風飛零落在中野有志獨無時客死燕山下老母  
倚門啼寡婦空閨處猶望錦衣歸飄搖素旌舉公車行上

策烏裘犯風雨卽歸良已愁况乃骨肉腐不見擔書囊何  
時藝稷黍東家負薪子帶索腰斤斧晨出暮叩門爲糜夜  
同哺聚首聊歡娛不自知貧窶死生是天運慟哭夫何補  
泉下戀庭闈啼魂繞環堵

稽留山人集目錄

第十四卷

做帚集

詩六十五首

擬漢橫吹雙角曲

澹公近作見懷却寄

擬漢鏡

歌

題畫

祝繆歌起太史尊人薛書先生暨王太

君雙壽

長歌壽宗緒表兄

賀朱揆敘擢銓曹郎

祝給諫查王望母陳太君七袞初度

送俞贊明

旋里兼詢尊師陸三梯霞

九月七日長人挈榼邀

同水修衛公柱峯豐臺尋菊

丁未九日

題畫

古意送計甫草還松陵

攜手行燕山旅舍水修至

有贈

贈吳應侯

姚胄師三十初度

鳧盟絕意

篇什丁未九月來燕山執持如故訝其立志堅果詩  
以問之言懷 丁未冬茂三從史立庵太史復來  
燕山相見之次傷同人星散聖秋早逝悠悠客子飄  
零何極漫成四韻情見乎辭 送沈繹堂憲副之任  
潞河 題王石谷畫冊 丁未臘月二十三日立春  
作 存歿口號題像 送周都諫菊人內擢清卿候  
補還里

稽留山人集第十四卷

丁未

詩六十五首

武水陳祚明翁倩氏著

擬漢橫吹雙角曲

有序

漢橫吹雙角曲古詞並亡六朝人擬作爲五言八  
句乖厥調矣燕邸暇日輒補其詞固戲弄筆墨縱  
意所至淋漓馳騁取快意耳眠饒歌不能大  
類稍不欲似太白以下未知於三曹何如也

長安道

長安道鬱何連綿金門玉爲闕峒堯于青雲馳道直如繩  
九達繚紹東西分車馬馭馭風揚塵五侯丹轂施華裯城  
門校尉行避人行避人到章臺側翠蓋扶輿駐路息少府  
挽韁御史下揖嫖姚從奴龍爲翼選浮雲駿以逝

紫驪馬

紫驪馬青瞳方赤汗流灘搖綠鬃白玉爲馬鞍轡用青絲  
籠平原百草汜光風矯大羽抨雕弓顧見雙黃鵠遨遊戲  
雲中雨如血六翮墮駸以馳至鵠所仰手接取拔我箭插  
腰袂斜倚盼狐兔伏匿烟迷離日落掩岷獠火熹微揚鞭  
蹀躞橫門歸

驄馬驅

驄馬驅驄馬逐乃到回中歷五柞左帶烏號右箭箠金丸  
作彈搏黃雀羽林少年郎身手好結束晨游蓮勺陂暮就  
倡家宿明燈煌煌縱六博作書寄謝父母但當飲美酒炙

生肉何能腰短鎌自刈南山粟

雨雪

雨雪綏以垂輕車行疾重車遲度關山步念之雪至牛日  
泥沒馬腓中路車覆雙輪摧平沙浩浩甌脫低四顧無人  
北風怒吹十步一蹶五步一徘徊乃不知行役一何艱哉  
大危天子按劔怒將軍行點軍出師馬邑口轉餉受降城  
乃不知城下白骨一何縱橫健士格鬪死老弱將車行行  
行登高丘顧見獠火前山明邪許相和齊其聲當何所指  
貳師營千人努力萬馬鳴欲至不至風揚旌今我卧路斃  
何人知姓名

隴頭水

隴頭水流以東白石齒齒蒲葦芄芄隴頭水流以西平沙  
連雲道路迷戰士度隴去駟馬同聲仰天嘶一水分流會  
合無期玉關戍士行不歸雲冥冥雪山下控我長戟鼓我  
弩大宛降身毒附皇帝陛下坐甘泉將軍佩印士擊鼓

關山月

關山月皎以懸旆悠悠偏哉翻顧視匣中刀光景一何大  
寒芙蓉淬刀鏑盤螭刻刀環鑄用昆吾鐵黃金錯其間白  
沙漠漠黃河潺潺北斗墮地南斗闌干長安狹邪首朱樓  
切雲端銀缸陰陰颺紫烟甲煎蘇合膏以蘭流蘇復帳倚  
長嘆雞鳴天雨霜今我顧視衣裳單

梅華落

梅華落幡從風玉階朱閣翳簾櫳惻惻重惻惻美人開簾  
行太息步搖金爵釵翡翠裝首飾盤龍繡衲襠綵鳳雙飛  
翼立脚躑淚沾臆北風縹蕭天雨雪邊庭有健士從朝出  
戰至日昃寒無帛衣饑不遑食長安二三月桃柳鬱參差  
四月芳樹榮五月梅實離哉垂隴頭華舒以遲舒以遲落  
何早南風蓬勃吹白草內舍寡婦單乃不知邊庭健兒日  
就老

折楊柳

折楊柳送行人短條蔭車蓋長條拂車輪何用持贈君織  
成芙蓉裊青絲貫碧玉寶帶稱腰身爲君施裊結我帶行  
行重復行乃到橫門外顧見灞陵橋君行妾當歸石之磊  
砢水何灘漸行行且復止執手野踟躕攘袂舒皓腕折取  
道傍枝思君無終窮與君作鞭箠日遲遲二三月楊花飄  
颺謝楊葉君今何用持贈妾生當長相思歿當長訣絕

洛陽道

洛陽道直如絃西流之澗東有灑金城百雉鬱相連參差  
甲第浮雲端狹邪車馬行駢闐嵩山煙霞通少室五侯七  
貴鳴鐘食北邙松風吹不息塚纍纍藏路側仙人王子喬  
可望不可卽白鶴矯以翻遊戲日左側皇帝陛下坐明堂  
百千萬年壽無極

劉生

劉生居何所章臺大道傍白門闢朱樓槐柳列兩行驪馬  
控金鞍寶劍千金裝填填何隱隱賓客坐中堂鳴鐘奏絲  
桐作使邯鄲倡褐衣垢以敝袴裂無複裳舉頭左右盼徒  
步以徬徨劉生居何所乃到章臺大道傍舉頭睨謁者姓  
名道不詳出門肅客入舍客於東廂具饌羅衆饜沐用蘇  
合香人生世一何窮窘卽復自摧藏心知口不言但道不  
相妨府吏執刀筆國家有紀綱功曹檄亭長游徼警路傍

居人默無聲行者爲惻傷交錢八百萬丞相上封章金雞  
銜黃紙白日歸故鄉作書謝劉生久久不相忘

### 黃單子

黃單子好容顏金羈白馬織成鞵何用驅之白玉鞭好容  
顏黃單子偏以馳躡珠履攬身流盼目如水宛轉過青樓  
走馬不可止裾無襞積袴無複裏線絲織雙縑與君充下  
體行走馬不可止愁人之心黃單子

### 赤之揚

赤之揚我旂玃玃以九旂戎車轆轤驅華軒駕出長楊五  
柞間千乘萬騎射獵南山頭猛士暴怒脫兜鍪左手接飛  
鳶右騎脚黃彪朔風愁人心樹木何颯颯石之崔嵬谿谷  
陰幽五陵鬱纍纍祁連之塚荒哉丘鼓無聲馬蹄無迹誰  
家豎子行牧牛鞭我牛藍田下橫穿馳道泥沒踝

### 黃鵠吟

黃鵠矯以翻六翮一何厲疾翱翔戲雲間朝發青田津夕  
宿東海蓬萊顛逝陵倒景排紫烟下視人世一何苦辛野  
田漠漠禾黍離離澤雉耿介死鴻鴈不得高飛罟者設網  
羅虞人張其機食君之粟充君庖廚薑桂芍藥調和之今  
我顧視中心悲雄鵠去不顧雌鵠羽短焉能追

### 望行人

望行人目萬里傷春心華鬢靡夏日冬夜一何酷長歲其  
悵思不已河海水浩浩乃不知山嶺一何竦時行行重復  
行乃不知生與死望行人涕下不得止黃泉下相見倘君  
察識此

古劍行

古劍光陸離赭煜芙蓉花誰能鑄此劍干將與莫邪冶用  
赤山銅鞮鼓飛輪車朱火上通天鬱鬱陵紫霞龍虎相對  
守日月騰光華太乙下來視真人列如麻何當持贈天子  
與君斬白蛇風雨夜叫嘯靈氣禁百邪禁百邪服萬里佑  
我皇漢億千載朔而又朔始而又始

洛陽公子行

洛陽公子一何翩翩白馬黃金羈錦鞵貼連錢狐白之裘  
鷄鶡冠皎好白皙美少年綠樹春蒙茸出入長楊五柞間  
富貴勢厚盛曷不求真僊羅列五鼎食後房奏管絃何有  
金石固爲君保朱顏寒暑代相禪歲月忽徂遷烹羊宰肥  
牛燔炙割腴鮮醇酒五石餘要君倘來還

出關

出關門直視山川鬱以盤風雲亘萬里疆索相鈎連今我  
獨何之言當適荆蠻沅有芳杜澧有蘭含香布萼從風翻  
念欲贈貽君君之門以九重回頭顧瞻雙闕崔嵬切雲中



夾道蹲白虎當門五蒼龍思心徘徊不能通妒人之言易  
爲工願得陛下三千歲與天壽無窮

入關

入關門駕羸馬五里一顧十里一止顧見上東門宮闕之  
綺靡殷殷何沉沉長安盛戚里樓觀薄青霄複閣中天起  
朝聞鴻鐘暮不但已朱絲五絃爲君理引宮換羽刻流徵  
娛悅君心節君耳徘徊狹邪路顧見栢梁臺千門萬戶平  
旦開鯨鐘鼉鼓鳴薄雷後宮倡樂紛喧逐願一奉清宴挾  
瑟上金階

出塞

出塞北絕河西河西沙磧高復低蓬沙獵獵白草齊驟萬  
馬捷若飛前軍吹角起後軍振鼓聲中軍大將戴河魁射  
生校尉藏握奇踰葱嶺涉零支陵頭蘭轅月氏身毒雪山  
寒崔嵬去漢九萬里日月合杳星辰動移男兒橫行不顧  
歸安能局促卧窮巷朝從桑下食暮逐藿下棲

入塞

入塞鳴鐃旌旃飄颻駐軍細柳營放馬灞陵橋輕車將軍  
行上朝行上朝議功伐起西第並雙闕後堂懸歌鐘前門  
樹斧鉞部曲皆封侯休徒賚士卒六郡良家同日發賜帛  
一丈金一笏懷金負帛還故鄉行行瞻我里顧步循空墻

不見所居宅但見蓬蒿長蓬蒿一頃中有井井上生旅穀  
其下唧唧啼蛩螿時輓轡石作牀新婦晨出汲澣我衣  
與裳石牀拉運輓轡斷誰言人不亡近舍無老父誰何少  
年睨路傍淚被面下多謝諸少年問我欲語安得詳從軍  
歸來樂不如死沙塲

澹公近作見懷却寄

海曲遨游如昨日橫門悵望已三年不堪更累猪肝給無  
恙惟憑鴈足傳廣陌只如棲陋巷濁河偏似酌清泉違時  
仕隱俱寥落頗憶歸耕二頃田

其二

衝津司馬借賢勞日日長吟調轉高抱牘羣趨方據案解  
衣獨坐卽含毫知音見許頻傾聽和曲深慚久廢操此夜  
秋風吹客夢相思不畏越波濤

擬漢饒歌

務成

務成行偃僂躬耕隴上田唐堯就見之磬折畎畝間六馬  
駐路息翳桑相與言三問一不對疾走南山巖石巔而讓  
天下許由不可此言胡爲妄用釣我任重責厚爲君大難  
重瞳之子汗不暇乾手招巢父游戲雲端下視白日不知  
燠寒愚者多憂殉名取患寶道無營爰得所安

閑雲

閑雲靄靄起於東海猝逢飄風與白雲會自北徂西雨南海外蓬勃萬里莫不霑漑上天照臨九土所戴白日伏藏匿景晝晦逐物意移守真志遂

釣竿

釣竿何筵筵溪水何瀾瀾青絲爲釣綸香稻爲釣餌仰觀青雲俯視流水中心煩憂不能理今我不出生民一何毒荼父有死子兮妻有死夫今我出老大不得歡娛高車駟馬坐自拘民之皇皇目愁予溪水湛碧照見白鬚坐歎行復念歸我磻中居

黃爵

黃爵銜玉書翺飛上金殿百年不一來千年始一見火德應炎精羽毛歟已變赤爵來尾涎涎食君之禾集君苑顧視池中有鴛鴦梁上有紫燕芳樹華皛皛百草之葱蒨栢梁之臺侍君宴撞鐘伐鼓張宮縣歸去來歸去來東有東海玉山崔嵬鳳凰一母將九雛高飛不下其鳴喈喈

題畫

西堰橋西望不窮星移木落水流東寒蘆苦竹溪山色都在蒼蒼夜月中

祝繆歌起太史尊人蘇書先生暨王太君雙壽

蜀牋表謝 紫宸朝旋展泥金頌綠椒舉案鳩齊花裏杖  
稱觴人度竹間橋瀛洲獨步傳經羨茂苑從游問字遙樂  
府新編眉壽曲五湖明月奏簫韶

長歌壽宗緒表兄

自兄拂衣隱河渚七葉朱門守環堵甲子泥塗二十春六  
旬偕老甘貧窶當年匿影住空村無有擔石供饗殮兩親  
卧病藥餌缺求醫慟哭徒崩奔禱天割股救不及血淚淋  
漓布衾濕囊中不剩錢一文棺內各餘衣十襲古之純孝  
今所稀况抱志節爲布衣躬耕郭外田畝少負薪山中足  
力微至今青原不得葬暮雨秋風意悽愴我亦未成兄嫂  
墳乞食天涯迷所向古來富貴浮雲輕獨有區區忠孝名  
先業但能繼詩禮家風不在躡簪纓兄之大兒游汗漫短  
褐飄零歌路難次兒聞說通五經每過靈光能染翰不獨  
風塵嘆數奇有才亦復未逢時鳳池鴈塔何須羨且摘黃  
花對酒卮但令高敞營山麓春郊寒食深松綠歸來妻子  
啓柴荆白酒盈樽書滿屋此時把酒一高歌不問門前車  
馬多兄雖知足未稱意小第途窮可奈何白首齊眉吹鬢  
影灌園共汲花間井已斲仙芝練玉英絕勝枯蓬飛斷梗  
西湖水碧雙峯青老去垂綸應客星歲時拜起依家廟篤  
行於今卽管寧

賀朱揆敘擢銓曹郎

山陽茂宰似河陽殊擢初含粉署香朱邑聲名畱去任山  
公識度且爲郎雲霄得路方題柱風月當軒一舉觴獨喜  
交情容嬾慢竹林時復召嵇康

祝給諫查王望母陳太君七袞初度

東海有賢母奕奕霜眉長懷貞方盛年鬢髮皓已蒼教子  
通九經儒衣誦先王琢磨成令器比德於珪璋射策金馬  
門作令之炎荒海水翻白波鯨鯢亂縱橫烽火日夜驚連  
營鬱相望供輸困井里煩促如沸湯作書戒司牧撫民貴  
有方從容緩徵歛卽次招流亡百堵日就興負耒事耕桑

治平書第一殊擢來

天京侍從漢郎官影纓入承明改

秩遷黃門伏蒲上封章對仗讀彈文白簡凜秋霜請急歸  
田廬視膳拜高堂滄江鯉魚赤東吳稷稻香阿母始開顏  
諸孫羅膝傍簡書自有程理楫戒行裝板輿雙畫輪翟茀  
前飄揚含笑不肯登吾老戀此鄉行矣念言責疾苦憂蒸  
氓昌言苟利國使我心悅康甘如飲醇醴飫如魚羔羊拜  
拜謝母教服之不敢忘入朝登殿陛抗疏審且詳吏有  
吮膏血其貪如豺狼大帥不戢兵坐使田作妨佩刀入村  
巷父老走伏藏雞豚不得畱寡婦以徬徨國法諒當伸軍  
驕何可長帝曰俞汝言釐察務周防詔書百餘字日

星炳煌煌設關逞暴吏轉餉要羨糧百貨橫取求破家爲  
供張種種皆上聞愛民如或傷作書報阿母其喜何洋洋  
高秋九月間籬落菊花黃七旬始初度開筵奏笙簧有子  
爲名臣雲路方翱翔朱顏倚鳩杖金骨日堅強浩蕩百川  
至東海流湯湯綠水如瑤池千秋樂未央

送俞贊明旋里兼訊尊師陸三梯霞

采玉兼采珠求道若不足我嬾耽晝眠便便但空腹燕山  
廣陌長邸舍隔萬屋歲月四五更執手間河濶下帷十重  
關沉深書自讀譚經教國子臯比坐尊宿解頤來匡鼎折  
角窘五鹿勤苦報師儒宰邑得微祿停年方待詔逢時未  
剖璞省侍暫言歸棹指秋江綠重向扶風樓絳帷聆絲竹  
五經有疑義爲我一反復若問汗漫游雪沒王生足

九月七日長人挈榼邀同冰修衛公柱峯豐臺尋菊  
尋芳纔出郭野趣似江南地曠山容吐村交樹色含已多  
楊柳陌何處菊花潭挈榼來偏後今朝飲興貪

其二

爲問豐臺路青村隱數家虛攜九日酒纔剩百叢花籬落  
衙山色蒲菰冒水涯朱門歌舞席千種絢雲霞

其三

共約惟芒屨能從有繡衣餐英尋較晚盈把摘全稀買誚

貧官儉栽須處士歸西湖三畝宅任我坐芳菲

其四

稀疎黃紫色駐立且徘徊爲戀臨風嗅真須冒雨來坐檐  
仍痛飲巡隴問初開芍藥明春好重游及早催

丁未九日

何人能送酒無地可登高髣影吹斜日秋風動二毛

題畫

霜葉侵霞赤晴川似練明小橋閒倚杖斜日聽灘聲

古意送計甫草還松陵

西門車馬道白楊起悲風落葉何蕭蕭送子歸江東襁褓

犯晨霜棲棲吾道窮許身諒有素長揖謝夔龍鳳德何其  
衰鍛翮墜蒿蓬 皇途不可階懼以畎畝終徘徊望 京  
闕去矣心煩冲

其二

游子衣裳單還家拜慈母白髮倚門閭望汝歸來久微軀  
冒嚴譴枉濫期一剖 九閭蓋浮雲虎豹天關守重趺三  
入關風塵負奔走色養良已違迤賤顏何厚秋風四壁立  
爲壽無斗酒何用慰高堂命也實不偶

其三

明發不能寐太息念先人束髮受詩書期爲廊廟珍聲名

起京國鼓瑟宴嘉賓上書棄不收擔囊行苦辛况乃橫  
排斥戶籍編庶民鄉里諸少年捷足據要津裘馬良翩翩  
飛蓋拂朱輪而我獨何爲輶軻長賤貧寂莫歸故園四十  
猶負薪

其四

執手臨路衢聽我歌一言攬衣拭子淚願子延長年公卿  
何代無身去名不傳顏淵在陋巷後世稱大賢稅駕從所  
好躬耕湖上田菽水奉老親樂志於林泉閉門謝賓客著  
書藏名山桂以香自焚膏以明自煎努力崇令德金石庶  
不刊

攜手行燕山旅舍水修至有贈

昔年避世友麋鹿我隱河漚君海曲乘興拏舟一到門鯉  
魚上釣酒新熟烹魚漉酒飲花間風吹花落衣斑斑山空  
水遠笑語響別有得意非人寰可憐八口闕衣食于人馳  
走金臺側一十三載風塵中鬢髮已白面黧黑中間乍歸  
不當歸天邊知己眼前稀只羨君身在霄漢豈知心事已  
多違秋風搖落金臺柳道上逢君更攜手衣裳且念故人  
寒顏色同悲賤士醜莫更京華擬賣文工書何處換鷺群  
淒涼悔別西湖水悵望空愁日暮雲

贈吳應侯



人生歲月如奔電二十六年不相見燕山道上此重逢鬢  
髮蕭條都已變咎時爾我各有兄兩家同里交相善西湖  
畫舫柳邊行吳山草堂花下讌少年顏色美如玉才子聲  
名人所羨華館笙歌百不憂由來只道黃金賤雕窓棐几  
陳鼎爨玉軸牙籤展書卷千金且購摩詰圖十萬聊持右  
軍扇每到君家得縱觀觸目琳瑯不能徧別後烽烟淚濕  
巾一身亦似子雲貧敝裘羸馬三千里更逐長安日暮塵  
袖裏虛勞攜綵筆篋中聞說有奇珍誰能好古求真蹟止  
值悲秋遇故人

姚胄師三十初度

三春柳鞞玉河烟鱗波湛綠照金鞵蘭帷鴈柱撥鴟絃子  
虛賦寫桃花牋銅駝巷陌聚香塵歲星騎虎駕朱輪綠杯  
筠翠沾絳唇知是金華樓上人

鳧盟絕意篇什丁未九月來燕山執持如故訝其立  
志堅果詩以問之

申子工詩者三年廢苦吟養生惟讀易屬和少知音池草  
生朱邸籬花映碧岑夢中如對酒幽思若爲禁

言懷

人生被陽和密室御狐貉白骨亦已寒陰風棲斷藿十年  
哀原隰傷心棠棣作韓生艱一飯高敞萬家拓旅哭身不

歸西山莽寥廓

丁未冬茂三從史立菴太史復來燕山相見之次傷

同人星散聖秋早逝悠悠客子飄零何極漫成四

韻情見乎辭

復作燕山客良知挈汝來酒人餘舊侶朝彥半時才蕭寺

游須共黃壚過一哀滄江思宿諾頭白釣魚回

送沈繹堂副憲之任潞河

外臺持節聽鳴鏡潞水仍分甸服茅每向雲中瞻 北闕

還從日下尹東郊境連三輔探九息地敞重關貢篚交誰

頌清風如吉甫褰帷意氣建雲旂

其二

臚傳金殿羨登瀛臺館同推燕許名一去鸞旂頻悵望重

峩豸冕借澄清上都草偃來風后阿閣梧高待月卿陪侍

舊同珠履客僊珂預聽玉階鳴

題王石谷畫冊

有序

余在燕中亦聞石谷山人名偶見一二小畫欽爲絕構丁未冬子與邵先生自吳門來出其做古十  
二頁見示結構命筆皆以心入古人之意而默會其自得之趣故沛然出之如古人之身爲非後人摹古人於一筆二筆間爭似不似也至其天機流行匠心獨運別有神氣在皴染楮墨之外余亦不能言之子與欲余每幅題絕句一首兼評論數句余非知畫者何敢強作解事顧石谷畫不易得子與自歸吳門從之游處者累月始獲此十二紙深嗜篤好若是誠雅人韻事足傳千古數百年後觀

者不惟嘆石谷名蹟之妙且以知子與非尋常士  
可追想其風流興趣也遂曲徇其意僭爲題識兼  
跋于後而歸之子與其善爲收藏勿更令  
手筆濫惡如余者妄加塗抹損此珍翫也

其一 倣趙松雪夏木垂陰林氣山容皆有淹潤  
盆解茲爍石不覺瀟灑  
之致拂拂從十指出也

赤日炎埃爍萬峯被裘野老倦扶筇千章坐蔭繁陰好遙  
指前山雨氣濃

其二 郭忠恕柳溪待渡圖景色森秀筆意道隳  
尤喜其抹水波數筆腕力圓轉有法閱之

如對此茫茫百端交集  
矣豈復思褰裳濡足乎

碧溪雨漲水滌洄榆柳扶疎籬落開日暮行人猶望渡不  
知誰是濟川材

其三 高房山大姚村圖烟霧迷漫筆墨  
酣恣所謂元氣淋漓鬼神入也

急雨奔泉洗白雲空山黯淡泣離羣落日蒼茫烟霧裏臨  
風何處吊湘君

其四 二十年前雪夕泛舟西湖四山堆玉令人  
魂魄俱瑩此幅擬素成雪景森寒之境極  
目高深便欲置身其中滌去  
面上塵一石余益思歸矣

燕山一冬朔雪稀狹邪馬首紅塵飛誰將江左千峯色歷  
落圖成趣我歸

其五 大癡富春山圖意巖嶺鬱盤而筆勢飛舞  
正如王右軍書龍跳天門虎卧鳳閣不以  
行間茂密爲工

千溪萬壑水潏潏霞氣朝生梁棟間試伐筠竿堪把釣故

鄉元傍富春山

其六

范華原山川出雲圖氣勢磅礴所不俟言寫雲色馥郁飄動有如游龍寓目之頃見其欲舒欲卷此非今人所能耳

江上嵯峨峯勢尊天門日觀等兒孫迷離草下生雲霧易

向滄洲潤綠邨

其七

巨然茂林疊嶂莽蒼中更饒深秀之致小橋曲澗一帶便作百折紆迴石谷胷中丘壑無盡不似他人以粗疎數筆效董家皮毛也

山人入山恐不深厭見俗物相招尋窅然圖寫千峯曲別

有千秋大隱心

其八

趙大年水田蒲柳繪水有聲意到水隨汪洋一瀉技進乎神矣

漠漠水田飛白鷺向來解讀右丞詩新蒲細柳圖中見遙

想江南雨過時

其九

畫寫色與寫形者已殊色非朱碧之謂水墨中亦有色耳又進而寫聲聲不在筆墨中亦不在筆墨外畫者與閱者恟悅相遇各不自知覺性在人可以耳視以目聽於此喻矣此臨王蒙松風飛瀑不識有溪山林木唯聞蕭颯之聲其中雲氣蔚然隔斷山嵐泉脉非人意想所及是為萬山松泉之響與一丘一壑盤桓撫樹者不同矣

慈仁寺裏聽松風闐闐人烟上梵宮老耳何時臨絕壑蕭

蕭併在水聲中

其十

做荆浩筆丘壑深邃而布置自然枯木數樹稠疊有法若不經意故佳

萬山水落見人烟想像江湖平治年二叟拏舟聊並語場

功收穫話農田

其十一

承旨春山圖林影水姿融和有態波色  
近濃而淡台如笑之態超然可會固不  
僅以位置深曲景  
象密麗為擅場也

春山遮莫是何山承旨金門未擬還此日更看摹妙迹深  
傷短褐滯人間

其十二

做梅花道人老筆無  
敵余詩略能道之

萬壑蕭蓼木葉乾毫端墜石墨光寒都將草聖為山色正  
得三杯酒後看

丁未臘月二十三日立春作

今日東風至燕中又見春五旬將近歲六載未歸人北地

柳芽晚西山梅萼新客身忘節序潦倒閱芳辰

存歿口號題像

滇池虞虞山吳門鄒子與及楊  
鄭兩君共圖一軸子與乞余題

談禪鄭老圖中見任俠楊公栢下居惟有堯夫詩百首愛  
吟時倩永興書

送周都諫菊人內擢清卿候補還里

盛代賢必庸股肱置左右豈云嘉乃績優游俟巖岫國是  
藉昌言臺垣考敷奏以直躋崇階上卿弼元后歲擢人濟  
濟行歸馬驟驟十年尚家食黃髮初求舊是事厯 主心  
銓除會釐窳戕戕青瑣材嶽嶽繩愆謬九列報成勞三遷  
用寧後簡在始旋登群英隨輻輳東山不煥席行李勞奔

走

稽留山人集目錄

第十五卷

敝帚集

詩七十六首

戊申人日大司馬龔芝麓先生招同諸名士雅集病

不克赴遙次席間韻 十三夕偕張彥若吳興公李

條侯諸駿男邀江浙同人米園小集漫賦 十九日

毘陵蔣御六吳門邵子與招同諸君讌集 送趙天

羽之任交城 和水修十香詞贈郭錄事香十絕句

再詠前題戲用藥名作韻兼嘲衛公 磽磽行

宋蓼天太史移鱗故少宰園亭招同子俶水修奉陪

振音翮羽看花小飲水修有賦慨然和之 四月四

日同人釀飲西河徐家水亭閻古古先生拈濤字亭  
字要客共賦七言二章不耻濫竽輒有斯作 送表  
姪諸駿男之蜀 寄螺浮 四月七日閻古古先生  
招同諸子再集徐家水亭分得東字 贈屈翁山  
重午前二日同人重集西河水亭卽席分賦時屈翁  
山將歸嶺南并以識別得刪字 楊仲博來探柱峯  
於其歸也賦詩言別 送傅雨臣侍御巡鹺河東  
題畫送張彥若山右之行 邵子與以宣德牋索贈  
句書長歌與之 戊申五日 六月望後一日被酒  
作 再咏一絕句 初秋送方貽請急還里 冰修

附柱峯舟載南歸惜別 七月移寓振音寓齋口占

九日送繆天士歸里 老友陸子胤自遼陽詣燕

山見訪旅舍畱飲感賦 備與弟補博士弟子員

敬敷姪是侍御泰巖長君偕備與弟同入泮宮喜贈

題李武曾灌園圖 錢內翰葆勳母劉太君六十

壽 贈史僉憲雲次督學中州 題畫送吳興公還

下邳 和李武曾雪夜見懷之作 吳磊齋都諫爲

先兄座主黃海岸儀部之師衣鉢三世並從容就義

燕山道上逢都諫令子季容先生述淵源之義慨然

於懷輒有斯贈 有述 董約之爲文敏公孫賢兄

對之先兄薦守歸德歿已久戊申冬日相逢燕邸共  
話疇昔有詩見贈率然和之 訓海豐令阮上扶長  
公孚若 除夕同子開小飲送年漫賦

稽留山人集第十五卷

戊申

詩七十六首

武水陳祚明肩倩氏著

戊申人日大司馬龔芝麓先生招同諸名士雅集病  
不克赴遙次席間韻

張筵差日逢今日伏枕經春實怕春折簡相邀大司馬曳  
裾定有三千人城邊走馬奄微息勝裏看人失健神遙想  
管絃催命酒一堂珠履昵春申

十三夕偕張彥若吳與公李條侯諸駿男邀江浙諸  
同人米園小集漫賦

華燈五夜笙歌始清酒三升臭味醇客子聊爲今日主名



園偶聚一時人已多華髮嗟逢歲喜接青雲共一春來者  
悠悠千載後可將高會記良辰

十九日毘陵蔣御六吳門邵子與招同諸君讌集  
京華已過懸燈夕邸舍仍開置酒筵上客半同前夜集主  
人獨讓二君賢百壺細瀉移清漏萬燭高燒吐絳烟此夕  
和歌無淚下燕中落魄不知年

送趙天羽之任交城

本以司李改秩

卽勞佐郡惜長才花縣何當飛鳥來官省簿書堪併領政  
成絃管自徘徊星占參野唐風古河捲龍門禹跡開正值  
親臣分陝日循良會有薦書推

和冰修十香詞贈郭錄事香十絕句

夜月鳴僊珮朝雲濕羽裳人間纔得見疑是杜蘭香

其二

章臺大道傍小衛拂垂楊爲望靈芸至微風起雜香

其三

入門蓮作步翠帶裊風長自有春華氣非關衣上香

其四

六幅湘裙正端然坐翠牀移時聞悄語風細口脂香

其五

黛色蛾眉影琉璃硯匣光低頭向書客纖手爲焚香

其六

直置傾人國真須老此鄉都憎膏澤浣惟有玉肌香

其七

東風簾幙靜花落自飄揚日暮維摩室空中聞妙香

其八

得共花前飲清齋命綠觴可餐惟色秀遮莫似風香

其九

橫陳此何日蘭燭耿幽房爲問銷魂處鴛衾作底香

其十

山塘連虎阜千載酌真娘北里成新志長畱姓字香

再詠前題戲用藥名作韻兼嘲衛公

衛公隱於醫郭姬其所狎也

韋曲花無賴春來客子狂竟須栽夜合不復採茴香

其二

鶯鶯選樹坐燕燕壘巢忙客舍低帷日三春草木香

其三

搗藥臨丹竈題詩弄筆牀青燈看把卷小室傍芸香

其四

玉杵問裴航姮娥檢藥囊唾盂如欲製可有水沉香

其五

爲泥麻姑飲脣朱漬玉漿百花僊醞熟瓊內泛松香

其六

由來綦縞婦只自饜糟糠翠袖傳杯飲羹烹葵藿香

其七

不肯畱髡住初更掩曲房羅帷聞密語微笑摘丁香

其八

障風低紙帳行雨解羅裳新剝鷄頭肉依微識乳香

其九

乍疑逢洛浦不分夢高唐春氣應熏髓山風散麝香

其十

結束平明去悠悠後會長臨岐回首約低語吐檀香

饒曉行

陌路初相見依依劇可憐負儂非一事好去趁風烟

宋蓼天太史移罇故少宰園亭招同子俶冰修奉陪

振音翮羽看花小飲冰修有賦慨然和之

星歸箕野去莊剩午橋畱十載林陰長三春花事稠空園

巡仲叔舊閣坐羊求花向新知笑苔迷故客愁

其二

載酒看花飲哀師宋大夫聊爲竹林會應憶杏壇趨鄴客

餘陳椽周侯亦孔徒吞聲陪雜坐紅萼點平蕪

其三

不敢仍爲賦驚心又一春  
高歌中坐起濺淚四筵人  
洛下來何晚東山跡已陳  
當年桃杏短花外露朱輪

其四

博物張公在應須愛陸機  
卽看懸一榻久已閉雙扉  
畱宿燈空照同游酒共揮  
聞歌花盡落爛熳撲鶉衣

四月四日同人釀飲西河徐家水亭聞古古先生拈

濤字亭字要客共賦七言二章不耻濫竽輒有斯

作

麤氈柳色鳳池高水漫金塘  
瀉碧濤客子殊方同選勝佳  
辰貰酒一忘勞衆中枚叟先  
探韻酷有劉伶愛餽糟醉去

但令僮荷鍤不須臨水賦離騷

其二

城西遙見暮山青此地偏宜闢水亭  
馬蹴輕塵穿暗柳魚吹細浪汜新萍  
羣賢授簡才無敵上客飛觴酒莫停  
潦倒巴人休共笑長齋此日詎能醒

送表姪諸駿男之蜀

餽口之四方長貧怨韋布邇自齊東來復向巴西去  
錦城兵荒後郡邑失繁庶白日戰鬼啼干峰黯雲樹荆榛未墾闢  
蹲鴟在何處殘黎食不克三戶衣無袴行省筦征徭鞭撻計財賦  
軍儲旣須供民隱亦當慮記室得才賢謀謨佐

仁恕稍爲起瘡痍因之事耕作驅車望漢江宛轉巴字露  
石礫填壩體虺蛇嘆白霧千里人烟稀黥洞精靈聚眠食  
慎昏朝風濤畏津渡嗟君未易才坎壈時不遇功名何足  
懷所貴濟時具外家曾大父先正挺高步紛綸嫻經術博  
奧工詞賦學優有元本才美非章句聚米圖山川如流誦  
掌故孝廉射策老別駕歸田暮經綸適不展千載存聲譽  
諸孫雖秀出斯人美無度宅相思齊賢勉旃回殆庶我母  
亦自出服義良有素道德私淑遙飄零自棄固青雲盛年  
美白髮衰朽誤乘時會廟廊謀食聊道路倘過浣花溪尚  
想詩人趣纏綿每飯情喪亂隻身寓或經籌筆驛吊古多

寄螺浮

永慕管樂夫何人一木支割據昔賢散浮烟吾老若朝露  
臨岐贈言長荒頽語無序相思蜀道難江山莽迴互  
一官如浮雲再疏懸白日荆湘近長沙外臺麾手出束裝  
要偕行下客本親暱我豈戀京華徒爲故人尼論交前  
後分投分厚薄一幕府不得從悒快難具述君心詎能諒  
含意徒未悉南雲漾旌旆引領風水驛

其二

畱居實惜勞寸心有維繫如何鉛刀鈍共許剗割力分陝  
移重臣開府涖邦域地大畿輔衝官崇司馬職記室藉賢

才纁黃粲五色傳書禮幣重趣駕期會亟匹夫乃有志貴  
自行胷臆千金鄙人慕易盡復難得長揖謝軍吏冥鴻不  
可弋

其三

睠睠門下生踽踽長安陌風雨聊與共青燈話疇昔公府  
辟不行知非薄遷客持此謝知己我心良匪石鬱紆想滄  
江坎壈嗟宦迹省官承 詔令歸躡東山屐

其四

撇波鯉魚至尺素書欵曲之官舟未發訛興流言數神羊  
峩其角本不憚抵觸命也有定端安坐待詔獄天濶緹騎

杳水泛汀洲綠荆南實衝要饑餒人似鵠軍營雜閭井降  
帥連高纛無鳩藉安輯兵民互連屬起敬邀上官淳化寧  
土俗三月政已成風動俾從欲

其五

遂有歸田賦不俟辭官札青山海隅僻三徑脫車轄看花  
玉缸湛種稻桔槔滑 魏闕忠不忘軒冕情已忽縱橫字  
數百封題書尺八寄我契濶語悲歡意塊北畱滯會面難  
奮飛羽翮鍛丹心奉一人精誠會見察何時把罇酒坐使  
百憂刷

四月七日閩古古先生招同諸子再集徐家水亭分

得東字

峒堯欄檻水聲中載酒重游發興同河漾晴光如昨日柳  
欵弱態變薰風衰年作客懽騰醉耆老呼朋跋扈雄記憶  
西湖歸去樂獨支藜杖立墻東

贈屈翁山

翁山嶺南人能詩初隱于緇衣其  
後長髮娶於代州有老母在家

聲名京洛重人物嶺南奇道大逃禪小光和混俗宜猶  
婚情半得不宦數全奇襪被長為客悠悠信路岐

其二

把臂逢吾黨悲歌共酒人雲迷銅柱塞水樂去聲玉河濱稍  
出離騷賦同憐落魄身姓名今始識三戶楚餘民屈氏固楚後

其三

如何象郡客翻指鴈門歸亦擬偕荆布相將戲綵衣風塵  
艱跋涉貧賤失輕肥徒步嗟儒服還如杖錫飛

其四

古道蕪誰剪華篇秀可餐世應嚴玉尺吾欲讓珠盤鬪捷  
千篇富求工一字安何時攜巨麓傾與老夫看

重午前二日同人重集西河水亭即席分賦時屈翁

山將歸嶺南并以識別得刪字

五日燕山鄰節序羣公水檻更追攀臨濠乍得莊生樂度  
嶺偏逢屈子還幸不沉淵休獨醒同為逆旅亟乘閒河梁

錄別千秋句詎似蘭亭序可刪

楊仲博來探柱峯於其歸也賦詩言別

一騎翩翩走上京關河游歷往來輕肯將行李煩東道獨  
擅生花賦北征驄馬聞嘶臨別路鱸魚正美計歸程浩然  
不改商歌樂墻外時傳金石聲

送傅雨臣侍御巡鹺河東

梧掖分棲栢府年巡行衣繡借才賢鹺池雪暎三秋月雷  
首雲橫萬仞天民富炊烟資近寶官廉飲水佐籌邊鄴侯  
轉餉功書最剏署看從華省遷

題畫送張彥若山右之行

唱徹驪歌日未曛勞勞亭畔惜離羣行山詰曲羊腸路馬  
首迴看闕下雲

邵子與以宣德牋索贈句書長歌與之

書簾小戶飛紅塵門外軋軋鳴車輪紫研無光墨丸澁宣  
德長牋汗沾濕故人要我贈新詩十指拂拂生涼颺人生  
知己不易得白雪陽春歌爲誰江左風流茂苑客不求聞  
逢航泉石長安卿相盡知名邸舍掩關時避跡唐人法書  
元人畫興來點染娛晨夕賓至烹泉潑茗椀日長揮扇眠  
桃席金張李趙爾何人掃徑但欲延三益交君不異飲醇  
甘愛我還同嗜痂癖六月炎天久閣筆案頭緗素堆一尺



今日高吟伐木篇心在滄江烟水碧

戊申五日

今年燕中夏月旱天氣不得陰陽和白日始出恆晦昧霏  
霏霧隱層城阿稍時疾風乃怒發赤輪照曜炎埃多聞道  
江南豆麥爛甚雨田畝連江河山東地赤蝗蔽野草芽嚙  
盡畝蓬科民生已自活計少復值凶荒愁柰何客中五日  
不稱意且莫弔古悲汨羅家門八口望斗粟歸共子姪行  
授禾

六月望後一日被酒作

我生之年四十六終歲憂愁苦不足一身長自攜蒯緱八  
口何曾給饘粥讀書不得師古人學道更患吾有身覩顏  
隨俗空俛仰下意謀食多酸辛山林市朝了無異尚想生  
初尋所寄有定從知命固然已隱還悲世難棄不堪明發  
涕滂沱青青之蒿非菘菘生事飄零已如此家聲凌替當  
如何

再咏一絕句

遺名了無慕悟道亦何益顧茲蜨夢身率爾鴻泥跡

初秋送方貽請急還里

不逮陳情養方爲移疾行一哀消渴重五兩馭風輕墓栢  
攀應從臺烏繞亦驚日長同許國堂上勉清卿

其二

朱邸依棲久能忘薄宦貧寒燈思硯席濕雨送車輪夢濶  
隨湖水身孤滯洛塵臨岐翻佇立爲我一沾巾

水修附柱峯舟載南歸惜別

入洛非初意還將失意歸長川依雀舫甚雨冷鶉衣寓目  
裝翻減圍腰帶不肥故鄉如有業何事別漁磯

其二

賦出高聲價才名滿洛陽逢迎親酒食貴倨薄文章凍餒  
歸仍得艱難出備嘗買舟金幸省容易發河梁

其三

爾我悠悠意風塵異去畱一時輕偶聚兩地耐長愁陋巷  
提空橐他鄉攬敝裘莫言媿黃綺不得似枚鄒

其四

畱居成不返歸去豈長辭下客旁看賤高人彼一時春明  
還覓載燕市待銜卮各鬪身強健從添鬢裏絲

七月移寓振音寓齋口占

開院容安榻晨風亦選陰開爐徐拜火食玉銳求金鄴架  
從人讀家醪與客斟飄搖穩棲息牖戶一枝深

九日送繆天士歸里

薊北登高日江南望遠愁那堪臨別路送客上歸舟一榻

懸青瑣兼金奉白頭故鄉饒筍蕨椒酒碧初筍

其二

寂寞身長隱陽春調獨高國風開蔓草轍迹翳蓬蒿貴紙  
矜花筆斑衣暱緼袍將因聞塞鴈尊鱸憶江臯

其三

九日年年淚登樓一舉觴花黃邊地小雲白故山長貫酒  
探空橐開帆睨去裝他時尋海曲此別怨河梁

老友陸子開自遼陽詣燕山見訪旅舍留飲感賦

六旬老叟華亭客中原宿許文章伯十年謫戍赴遼陽形  
容枯槁鬚髯白生平三婦豔如花麻衣犯雪從風沙長男

萬里滇南去父子飄零何處家近育小男一雙玉七歲扶  
牀書解讀爭問葺城春若爲朝朝偏指南雲哭今年詔許  
齒編民不屬將軍自在身短衣匹馬關山道纔到燕中見  
故人我昔舉家迫奔竄兵戈未起逢家難辟疆園內一枝  
棲飽食坐看花爛熳釋紛解鬪情依依沒齒銜恩誓不違  
倉猝驚看嚴譴及慙無貨賂贖君歸君來翻道遼東樂生  
事蕭條惟賣藥絕塞仍書戶籍名北海之濱天漠漠幼安  
昔日此巖耕華表僊歸空月明古今誰繫白日駐富貴豈  
直浮雲輕畱君且沽燕市酒酒酣起舞爲君壽不論七十  
古來稀小弟彊年已衰朽朋交屈指異存亡共是狂夫老

更狂容輝得見非常日行樂何須在故鄉風塵傾洞無南  
北初月不光庭樹黑醉眠各自擁秋衾旋別銷魂淚沾臆  
備與弟補博士弟子員

難弟聲名自潁川吾宗重見季方賢讀書喜映千山雪搖  
筆能飛萬斛泉虎觀譚經看奪席鷺雝釋奠聽鳴絃春風  
上苑開僊杏預喜盤根近日邊

敬敷姪是侍御泰巖長君偕備與弟同入泮宮喜贈  
蘭臺繼美有超宗璧水同升卽仲容上國諸生歌振鷺吾  
家千里快如龍毛詩疑義傳經析魯殿雄篇載筆從及到  
慈恩書姓氏歸來邸第沸歌鐘

題李武曾灌園圖

白璧黃金聘不起灌園獨有於陵子我亦悠悠避世人釋  
鋤遠適新豐里不言時貴有逢迎實爲貧家憂凍餒湖上  
曾無二頃田門前聊樂三秋水何時得金營一園白韭青  
菘自經理抱甕閒閒獨徃來分畦瑣瑣羅青紫盤中蔬熟  
牛羊下籬外花香蜂蝶喜得飲偏宜綠蟻浮飽餐不美鱸  
魚美道上車塵不入門肯向華堂躡珠履君今有園不暇  
灌長鋏蕭蕭亦來此三千里外東湖烟荳苗蕪穢秋瓜死  
高眠一榻且著書競寫三都方貴紙故園只在圖中見茅  
屋如尋樹邊是君才本合步巖廊長恐名成廢耘耔何時

稱意掛冠歸雨笠風簑白今始我來相訪話桑麻更繪扁舟碧波裏

錢內翰葆勳母劉太君六十壽

春雲泖湖波中有賢母居林際發清磬蒲團坐空虛青髯歸秋卿翟衣登篆車官廉門似水自理園中蔬天長九峯水門掩中田廬寒夜治機絲青燈授詩書機絲五采成詩書錦不如簪筆步鳳池裁 詔歸金除致身躋華要念母良勞劬華髮耳目強名理樂有餘願奉南山壽酌醴鱸江魚象賢美無度復始崇高閭承顏愛日長華省迎潘輿却杖行花間鳴珮來徐徐

贈史僉憲雲次督學中州

經義儒生業因仍取士年微芒叅靜理隱秀吐華篇策美揮毫射文看貴紙傳揣摩書案就抄誦國門懸釋褐金閨步含香粉署遷寇源清伏莽主萃問藏淵執訊資三略寬平佐五絃才名方妙簡文教命敷宣峻嶽瞻中土長河納百川六經勤講肄多士費陶甄往者荆公法千秋令甲編代言探旨趣對偶綴駢聯錦各營心麗九宜脫手圓開山如鑿道異水欲飛泉暫廢將移俗從來頗得賢維新仍廣厲由舊合微權取火應求燧聆音解辨椽盡搜巖穴秀上賞袞衣還

題畫送吳興公還下邳

燕山爲客但蹉跎  
邳邑躬耕水旱多  
不若將家湖上住  
定香橋畔一漁蓑

和李武曾雪夜見懷之作

同雲漠漠暗千門  
朔氣蒼茫萬里昏  
客夜夫君歌白雪  
纔聞苦調已銷魂

其二

故宮牛首散羣神  
剡曲曾無訪戴人  
躑躅天街同曳履  
驚心飛雪似揚塵

時武曾兼懷伯紫鄧山

其三

苦憶西溪萬樹梅  
十年不見雪中開  
不因寡和頻投筆  
無計銷愁併擲杯

吳磊齋都諫爲先兄座主黃海岸儀部之師衣鉢三世並從容就義燕山道上逢都諫令子季容先生述淵源之義慨然於懷輒有斯贈

烈烈風揚沙燕山如朔漠凍雲死灰色  
白日光景弱百川一層冰魚龍泣窮壑  
於此別夫君天地莽寥廓先公蓋臣誼  
抱道崇澹泊我我諫垣長論事多蹇  
諤時否宗社墟正殿坐跼蹐白練經  
紫薇乘輿露一脚萬姓潛酸心邦家隕  
秋籜毅然追龍馭引決無諛度桐棺歛  
遺骸古寺魂靡托

疇昔秉文衡騏驥共騰躍南州黃夫子道同志相若傳衣  
溯淵源得士更摸索我兄越石流賓興釋疏屨私淑許升  
堂善誘意不薄風塵一傾洞就義成盍各柴市秦淮河止  
水會稽郭後先隨致命忠烈無愧忤宮墻傳一再庶不負  
所學絳霄鏘玉珮相視心實獲夫君承素風灌園藝葵藿  
大能讀遺書幸不撓好爵及茲汗漫遊襍被聊入洛徒步  
衝塵沙褐衣故寬博踽踽交游稀悵悵心期惡神沮泣衰  
鳳骨瘦悲病鶴吟詩披古囊千人只空橐策蹇還鄉山慘  
淡意不樂我久滯異邦迷塗亦落魄飄零乍慰藉疎慢失  
酬酢驚心重分袂失路俱寂寞贈言叙舊好勵志甘隱約  
今知非悔在昨獨有勸加餐臨岐淚雙落

有述

我已慚填箎君其愛丹雘所嗟少田園不得安耕鑿驅馳  
違寸心行遯背宿諾或恐先靈怒無貽後人噓遂初將自  
分陝親臣出臨江幕府開一長聞總悞三聘却仍來謀食  
愁難饜成章戀取裁問奇航載酒不是孔璋才

董約之爲文敏公孫賢兄對之先兄薦守歸德歿已

久戊申冬日相逢燕邸共話疇昔有詩見贈率然

和之

元方名譽美君家宗伯諸孫自渥注不見雙旌悲露薤惟

餘孤劔走風沙沅湘楚調堪誰讀  
京洛雄文爲爾誇華  
髮故人逢市陌和歌真有淚如麻

酬海豐令阮上扶長公孚若

崇山僻縣聽鳴琴落月空懸萬里心乍見神駒堪濟美傳  
來錦鯉慰知音嶺頭梅發懷雙闕郭外花香美滿林此  
日趨庭還悵望白雲海畔一孤岑

其二

傳經才子似相如投贈詩篇更起予鳧鳥遙悲畱象郡鳳  
毛有日步金除故人老去空彈鋏下客年來只曳裾好待  
循良升瑣闥綠衣鳴珮看懸魚

除夕同子開小飲送年漫賦

朱邸依棲館舍間歲時賢主共開顏遠來老友堪容榻得  
似貧家竟掩關髣髴未能忘淨土蕭條何事戀燕山燈前  
試看垂垂髮及到明朝幾許斑





